

Women's Club of Aruba oficialmente a entrega

Archivonan Historico na Biblioteca Nacional Aruba

NA ocasion di conmemoracion di su 90 aña di servicio y empoderamento, cu satisfaccion Women's Club of Aruba (WCA) a haci entrega di su archivonan historico na Biblioteca Nacional Aruba den un gesto simbolico pa preserva su legado.

Den un ceremonia ameno, presidente di WCA, Sra. Reina Geerman, a haci resalta e importancia di e logro aki, reflexionando riba e historia rico di club, su impacto riba e hende muhe y comunidad di Aruba. El a enfatisa cu e archivonan ta representa mas cu documentonan; nan ta encarna e memoria colectivo y logronan di generacionnan di hende muhe cu a traha sin descanso pa haci e diferencia. A duna reconocimiento special na e damanan di e Comision di Historia, bou di liderazgo di Sra. Omaira Silva, pa nan trabou diligente pa prepara tur documento historico pa por a entrega esakinan.

A duna tributo special na Sra. Quita Croes, e prome hende muhe Arubiano cu a bira presidente di WCA, pa su dedicacion y liderazgo cu vision. Na e evento tabata presente miembronan di su famia, incluyendo su yiu muhe, Sra. Selena Croes y famia y su yiu homber Sr. Glenn Croes y famia. Familiarnan di Sra. Marie-Thérèse Croes tambe tabata presente na e acto aki.

E entregamento di e archivonan ta segura cu e legado di WCA ta keda preserva pa futuro generacionnan, permitiendone nan siña di e biahe di club y su contribucionnan. E evento ta simbolisa tambe e compromiso di club pa cu e historia cultural, ya cu presidente Reina Geerman sa di reconoce e rol di e Departamento Arubiana-Caribiana di Biblioteca Nacional pa salvaguardia e archivonan incalculabel aki.

E departamento di Arubiana-Caribiana di Biblioteca Nacional tin e coleccion cultural valioso di e documento- y materialnan original cu ta forma parti di e memoria colectivo di e isla. E departamento ta traha na conserva historia social, cultural, politico, y economico di nos isla, y su tarea ta di colecta, preserva, y organisa herencia documenta di Aruba, door di provee disponibilidad pa e comunidad en general. *"Awo e herencia documenta di WCA cu ta data di 1934-1961 ta pertenece tambe na nos Coleccion Nacional. Nos di WCA ta mas cu agradecido y encanta di tin e inventario valioso aki inclui den nos coleccion. Ta door di preserva coleccionnan manera esaki, nos por tin un bista den e bida domestico y di trabou di e dama- y cabayeronan durante e periodo menciona ... e esencia di biba den e temponan ey ora LAGO tabata opera ainda, pa ta parti di e Comunidad di Colony y loke ta mas valioso ainda, ta e trabou di caridad cu nan tabata haci"*. Tabata palabranan cu Zetsia Ponson di Biblioteca Nacional Aruba a comparti.

WCA ta mira padilanti pa continua cu su mision di duna servicio



y demuestra unidad, ya cu e entregamento aki no solamente ta marca un celebracion di su pasado, pero tambe un dedicacion pa su futuro.